

REFVTATIO
TORTV
RAE TORTI

Sen

Contra Sacellannm Regis Angliæ,
quod causam sui Regis
negligenter egerit.

Authore

R. P. MARTINO BECANO,
Societatis I E S V Theologo.



Cum licentia superiorum.
M O G V N T I Æ,
Typis I O A N N I S A L B I N I.

A N N O M, DC. X.





R^{mo} A C I L L V.
S T R I S S I M O P R I N C I -
P I, A C D O M I N O D. I O A N N I S V I -
c a r d o S. S e d i s M o g u n t i n æ A r c h i e p i -
s c o p o, S. R o m a n i I m p e r i j p e r G e r m a n i -
a m A r c h i c a n c e l l a r i o, & P r i n c i p i E l e -
c t o r i, P r i n c i p i a c D o m i n o s u o
c l e m e n t i s s i m o.

M A R T I N V S B E C A N V S
P R o d i e r u n t n u p e r, R^{mc} &
I l l u s t^{ms} P r i n c e p s, d u o
l i b r i e x A n g l i a: q u o r u m
a l t e r S e r e n i s s i m i R e g i s I a c o b i; a l -
t e r S a c e l l a n i i p s i u s t i t u l u m p r æ s e -
f e r e b a t. V t r u m q³, q u a p o t u i b r e -
u i t a t e a c m o d e s t i a, u t p o t e R o m a -
n a E c c l e s i æ p a l a m r e p u g n a n t e m,
V e r i t a t i s s t u d i o r e f u t a u i. E t q u i -
d e m p r i o r i s r e f u t a t i o n e m, I n v i c t i s -
s i m o I m p e r a t o r i R o d o l p h o, S e r e -
A 2 n i s

nissimis Regibus & Illustrissimis
Christiani orbis Principibus (inter
quos Tu emines) inscripsi ac dedi-
caui: posterioris verò, Amplissimo
Tuo Nomini, speciatim nuncupā-
dam censui. Causa duplex est. Vna,
quod cū catholica fidei ac religi-
onis propugnāda gratiā, hic labor
à me susceptus sit; nullius patroci-
nio potius, quàm Tuo, qui eiusdem
fidei in Germania magnus propa-
gator ac protector es, in lucem exi-
re debeat. Altera, quod tua in no-
strum Archiepiscopale Collegium,
Moguntinum merita & beneficia
iure id exigant. Accipies, opinor in
bonam partem; & quod obsequij ac
observantiæ testificāda causa sin-
cerè à me factum est, serena mente
interpretaberis. Deus opt. Max.

RE-



REFUTATIO

TORTVRÆ

TORTI,

Seu

In Sacellanium Regis Angliæ.

Vper scripsisti librum pro tuo Rege; contra Matthæum Tortum, cum hoc titulo; TORTVRA TORTI. Nomen tuum non prodis; sed insinuas te esse Sacellanium, Eleemosynarium, Tortorem. Ego quod honorificentius est, Sacellanium te appellabo. Disputas autem in eo libro de his tribus potissimum capitibus. PRIMO, de Iuramento fidelitatis, quod Rex tuus exigit à suis subditis. SECUNDO, de primatu Regis in rebus Ecclesiasticis. TERTIO, de potestate Papæ. Si verba spectem, satis cultus ac elegans es. Si laborem ac diligentiam, non culpo otium. At multa alia sunt, quæ non

æque probem. Hæc maxime. PRIMVM, quod ad cōuitiandum sis proiectissimus. SECUNDVM, quod multa falsa & absurda passim inspergas. TERTIVM, quod Primatum Regis tui, quem astruere volebas, euertas potius, quam stabilias. Quo nihil turpius. De his tribus hoc ordine dicturus sum.

1. *De conuitiis Sacellani.*
2. *De Paradoxis illius.*
3. *De Primatu Regis per eum euerso.*

I Gnoscas, spero, si hæc tria modestè ob oculos tibi proponam; tum tui, tum aliorum gratia. Tui, vt te ipsum agnoscas, &, si fieri potest, ad sanio rem mentem redeas. Aliorum, vt intelligant, non temerè tibi fidendum esse, qui toties & tam enormiter, in rebus magni momenti lapsus sis. Audi patienter.

C A P V T I.

De Conuitiis Sacellani.

1. **S**Tatim in ingressu Torturæ reprehendis

hendis Matthæum Tortum; quod totus in conuitiis sit. Sic enim de eo scribis; *Per librum totum ita petulans, ita immodestè immodestus, ita totus in conuitiis, facile ut quiuis, Matthæum Tortum esse, possit intelligere*, At tu, mi homo, longè superas Matthæum Tortum in hoc genere. Nemini parcis. Omnes, ubi minima occasio est, conuitio aliquo laceasis. Clementem 8. vocas *perfidum*; Cardinalem Bellarminum, *votifragum*; Nicolaum Sanderum, *mortalium mendacissimum*; Edmundum Campianum, & alios, qui pro Catholica fide martyrium passi sunt, *proditores*; Iesuitas, *atrocissimorum facinorum authores*; Catholicos, *de Malchi prosapia, qui præcisâ aure dextrâ, omnia sinistrâ audiant, & interpretentur*. Omitto quæ in Matthæum Tortum petulanter despumasti.

2. Hæc & similia conuitia quæ tibi domestica sunt, ut video, non decent bonum virum. Multo minus Sacellanium aut Eleemosynarium Regis, qualem te esse vis. Tortorem fortè non admodum de deceant. Nec est, quod te excuses exemplo Matthæi Torti, quasi is prior lacessierit te conuitio. Primùm, non ita est.

3. Neminem adhuc negasse, Reges veteris Testamenti, habuisse Primatum in Ecclesia.
4. Reges Noui Testamenti, esse pastores ouium CHRISTI.
5. Reges sæpè in Scriptura vocari *Christos* seu *Vnctos domini*; at Sacerdotes aut Pontifices, nunquam sic vocari.
6. Si Pontifex præter CHRISTVM, esset caput Ecclesiæ; monstrosam ac bicipitem fore Ecclesiam.
7. Si Pontifex haberet potestatem deponendi Reges, meliori conditione fore ethnicos, quam Christianos Reges.
8. Si Pontifex velit habere regnum temporale, suadendum esse, vt diabolus a-deat, & ab eo petat.
9. Excommunicandi potestatem, non esse Petro Apostolo, sed Ecclesiæ datam.
10. Prophetiam Apocalypsis de Antichristo, iam impletam esse, ac proinde claram & minimè intricatam.
11. Reges Daniæ & Sueciæ, nec non Principes Germaniæ, consentire Regi Angliæ in rebus fidei.
12. Regi Angliæ non esse iam liberum mutare Religionem, aut Catholicam in

regno suo permittere, eo quod bis iuraverit, se id non facturum.

13. Bellarminum esse Votifragum, eo quod ex Iesuita factus sit Cardinalis.

14. Catholicos docere, fidem non esse seruandam, & perfidiam esse licitam.

15. Catholicos esse de profapia Malchi, eo quod nihil dextrè, sed omnia sinistrè interpretentur. Hæc pauca ex multis breuiter examinanda sunt.

PARADOXVM I.

2. **P**rimum ergo ais, Puritanos in Anglia sincerè iurare in primatū Regis. Verba tua sunt hæc, pag. 379. in fine; *Quos verò Puritanos appellat, si Regium Primatum detestentur, detestādi ipsi. Profitentur enim, subscribunt, iurant indies. Sed & illi, quod faciunt, ingenuè faciunt, id est, ingenuè profitentur Primatum Regis, ingenuè subscribunt, ingenuè iurant.*

3. At Rex tuus multò aliter de illis sentit, in monitoria Præfatione ad Imperatorem. Reges & Principes. Sic enim de illis loquitur; *Præclara sanè laus, præclarum encomium, quo Puritanos ornavi, cū me plus fidei, vel in illis efferis, cū montanis, tum limitanis*

mitancis latronibus, quàm in hoc genere hominum inuenisse professus sim. Vide nunc, quàm longe abeas à tuo Rege, à tuo capite, & Primæ Ecclesiastico. Rex profitetur, se plus fidelitatis inuenisse in efferris latronibus, quàm in Puritanis. Tu contra asseris, Puritanos ingenuè facere, quod faciunt. Igitur, ingenui tibi sunt, qui Regi, plusquàm efferi latrones.

4. Addit Rex; *Ego à Puritanis, non solum à Natiuitate continuò vexatus fui; verum etiam in ipso matris utero propemodum extinctus, antequam in lucem editus essem. Quid tu ad hoc? An repetes illud tuum solenne; Puritani quod faciunt, ingenuè faciunt? Nimirum ergo, ut tu quidē interpretaris, ingenuè voluerunt Regē in utero materno extinguere, antequam in lucē editus esset. Et hoc, in tuo Sacello, est, ingenuos esse?*

5. Pergit Rex; *Ego in meo ad filium libro multo acrius ac vehementius in Puritanos, quàm Pontificios inuectus sum. Igitur ex sententia Regis, Puritani deteriores sunt, quàm Pontificii. At tu Pontificios vocas proditores. Puritani ergo proditores deteriores sunt. Et tu tamen scribis, ingenuè eos facere, quod faciunt?*

6. Iterum Rex; *Mihi precipuus labor fuit, deiectos Episcopos restituere, & Puritanorum Anarchiam expugnare.* Nimirum, Puritani Anarchiam amant; Monarchiam seu Primatū detestantur. Rex contra; Anarchiam expugnat, Primatū statuit. Nunc quæro, si Primatum detestantur Puritani, quomodo possunt in genuè iurare in Primatum? Vel ergo Puritani, non amplius Puritani sunt: vel si sunt, qui fuerunt; Anarchiam amant & Primatum detestantur. Non ergo *ingenuè*, sed *subdolè* faciunt, quod faciunt.

7. Vide, quàm in omnibus Regi tuo contrarius sis. Quos accusat ille, tu purgas. Sed tamen ab impudentia purgare non poteris. An non grandis impudentia est, & (si vis) imprudentia, quod Calvinistæ in Germania & Hollandia, qui nihil aliud, quàm Puritani sunt, toties ausi fuerunt recudere *Monitoriam* Regis tui *Prefationem*, in qua tam apertè perstringuntur? Quid enim magis spectare potest ad illorum ignominiam, quàm quod publico Regis testimonio habeantur deteriores latronibus, quippe qui in mortem Regis, adhuc in vtero materno existen-

existentis, crudelissime conspirarint? Et hanc tantam ignominiam, typis identidem diuulgare, nec infamiam publicam extimescere, nonne impudentia est? Et tibi nihilominus *ingenuè* faciunt, quod faciunt.

PARADOXVM II.

8. **A** Is Primatum Ecclesiasticum, omni iure, deberi Regibus. Hæc enim sunt verba tua, pag: 90. *Primatus spiritualis debetur Regibus omni iure.* Videamus, an ita sit. Ius, ut nosti, aliud naturale, aliud positivum est. Hoc iterum, aut diuinum, aut humanum. Diuinum aliud Veteris, aliud Noui Testamēti. Similiter, Humanum aliud canonicum, aliud ciuile. Vis ergo, omni hoc Iure Primatum Ecclesiæ deberi Regibus? Ita apparet. At alibi fateris, solo iure veteris Testamenti deberi. Non igitur omni iure. Sic enim scribis pag. 363. *Amore institutoq; Israelis orditur Apologia; inde enim vim habet, atque nervos suos questio hac omnis* (de Primatu.) *In Israele enim populo suo regnum instituit DEVS, & Ecclesiam in regno, ex mente sua. Exemplum inde nobis sumendum est, cum in*

Testamento nouo nullū habeamus. Nusquam ibi in vnum coaluerunt Ecclesia & Imperium; procul se habuit Imperium ab Ecclesia.

9. Agnoscis, opinor, hæc tua verba, quæ te condemnant. Nam si quæstio de Primatu, vt hic affirmas, non aliunde, quàm ex more & instituto populi Israelis vim suā habet; non ergo ex iure naturali, nō ex diuino noui Testamēti, nō ex Canonico aut ciuili. Quomodo ergo *ex omni Iure*? Rursum, si in nouo Testamento *nusquā in vnū cōaluerunt Ecclesia & Imperiū*; Ergo iure noui Testamenti nō necesse est, in vnū coalescere! Ergo nō *omni Iure*. Et sanè, si nusquā antea in nouo Testamento; quomodo nunc in Anglia, tam serò in vnū cōalescunt? Hic te ipsum plane constringis.

P A R A D O X V M III.

10 **A**is, neminem adhuc negasse, Reges veteris Testamēti habuisse Primatum Ecclesiæ. Sic enim habes pag. 364. *In Israele autem, nondum os reperi tam durum, quod negare etiam auderet, præcipuas in re Religionis partes, penes Regem extitisse.* At ego, non vnum, sed multos reperi, qui id ausi sunt negare. Ausi sunt ex vestra Anglia, Nicolaus Sanderus, lib. 2. de visibili monarchia

narchia ecclesię ca. 3. in solutione quintę Objectionis Protestantium, & Thomas Stapletonus lib. 5. principiorū fidei doctrinalium. c. 23. Aufi ex nostris Bellarminus li. 1. de Cōciliis, c. 20. Iacobus Gretserus lib. 2. considerationū ad Theologos Venetos, confid. 1. 2. & 3. Adamus Tannerus lib. 1. defensionis Ecclesiasticę libertatis, cap. 15. & alij.

11. Hi omnes, locis citatis, proponunt argumentum, quo vos vti soletis ad probandū Regis Primatū in rebus Ecclesiasticis. Est autem hoc. *Moses, Iosue, David, Salomon Iosias, & alii Reges Veteris Testamenti habuerunt Primatum Ecclesię: Ergo etiam Reges Novi Testamenti habent.* In solutione huius argumenti, omnes negant antecedens. Negant, inquam, Reges Veteris Testamenti, si præcise spectemus potestatem Regiam, habuisse primatum Ecclesię: tametsi concedant, aliquos ex ijs habuisse, non ordinario iure, tanquam Reges; sed quatenus erant simul prophetę aut Pontifices, per extraordinariam concessionem. Verba Bellarmini sunt hæc; *Respondeo primi, Moysen non solum Principem, sed etiam summum sacerdotem fuisse, ut patet*

patet ex psal 98. Moses & Aaron in sacerdotibus eius. Iosue autē, Dauidem, Salomonem, & aliquos alios, non solū Reges, sed etiā Prophetas fuisse, quibus DEVS quadam extraordinariē committebat, quæ ad Sacerdotes alioquin ex officio spectabant. Hoc modo Salomon Rex amouit Abiathar à sacerdotio, & constituit Sadoc pro eo. Idenim fecit, non ut Rex, sed ut Propheta ex diuina inspiratione. Dico secundò, alios Reges synagoga, qui boni fuerunt, nunquam semiscuisse in negotiis sacerdotalibus; & si quando semiscuerunt, punitos fuisse. Similia habent alij.

12. Hoc tamen addo (in quo tu fallis, aut falleris) nonnullos ex prædictis authoribus, non solum negare antecedens, sed etiam consequentiam argumenti. Itaque duas adhibent solutiones. Prior est hæc; *Negamus Reges veteris Testamenti habuisse primatum Ecclesiæ.* Posterior hæc; *Etiam si daremus Reges veteris Testamenti habuisse Primatum Ecclesiæ; non tamen sequeretur, etiam Noui Testamenti Reges eum habere.* Cuius rei varias assignant causas. Vide, quæ in eiusdem argumenti solutione à me dicta sunt in Refutatione Apologiæ Regis Angliæ, cap. 2.

13. **A**Is Reges noui Testamenti, esse Pastores ouium CHRISTI: & quamuis illa verba, *Pasce oues meas*, Petro dicta sint; tamen etiam ad Reges Christianos pertinere. Ideo autem illis dicta non esse, quia tempore CHRISTI nulli erant Reges Christiani, quibus cura ouium committi posset. Sic enim habes pag. 53. *Rex noster (Angliæ) est Dux gregis sub Christo Pastorum Principe. Sunt & alij Reges Christiani ad unum omnes, sua iura noscent, & vel vires illis, vel animus non deesset.* Et clarius, pag. 91. *Neque quicquam ad rem, quod de Christo addis, non Regem aliquem, sed Apostolum Gregis sui Pastorem designante. Certè, ut nec Regem sub lege, quia nondum ibi Rex ullus; at ubi iam Rex, tum nec ei Pastoris nomen negatum: ita sub Euangelio, cum non essent Reges adhuc, qui tum nulli erant, Pastores esse non poterant. At ubi Reges Christo nomen dederant, tum demum, non minus Pastores hi, quam olim Reges Israelis. Quod si autem ab initio statim nomen Christo dedissent, nulla ratio, quo minus gregis Christiani Pastores designari potuissent.*

14. Non vnum, sed multa hic Paradoxa.

B

Ac pri-

illa non intelligi de pastione Verbi & doctrinæ; aut Regi conuenire, vt pascat verbo & doctrina; aut certè Regem non esse Pastorem ouium CHRISTI. At hæc omnia contrate sunt. Vis verba CHRISTI intelligi de pastione verbi & doctrinæ. Vis Regem non pascere oues CHRISTI verbo & doctrina: Vis Regem esse Pastorem ouium Christi. Quo tandem euades?

16. Tertiò quæro, quare alii Reges Christiani non vsurpent sibi officium pastorale, si verè pastores ouium CHRISTI sunt? facerēt, inquis, *sua si iura nossent, & vel vires illis, vel animus non deesset.* At quid hoc aliud est, quàm dicere Regē Angliæ scientem esse, reliquos ignorantes? illum vires habere, reliquos impotentes esse? illū animosum, reliquos timidos & ignauos esse? Ita fit, vt dum Regi tuo assentari vis, in alios contumeliosus existas.

PARADOXVM.

17. **A**is Reges sæpè in scriptura vocari Christos, seu Vnctos Domini: ac Pōtifices aut Sacerdotes, nunquā sic vocari: ideoq; male fecisse Matthēū Tortū, q̃ Pontificē Romanū eo nomine appel-

B 2 laucrit.

in quibus sacerdotes dicuntur *Vncti*. Non ergo soli Reges dicuntur *Vncti*. Hoc discere poteras ex Augustino, in psal. 26. circa titulum psalmi, vbi docet, olim in veteri Testamento, vnctos fuisse Reges & Sacerdotes, idque propterea, quod vtrique figurarent vnum CHRISTVM, qui erat futurus Rex simul & Sacerdos. Verba Augustini sunt hæc. *Tunc ungebatur Rex & Sacerdos. Dua istæ illo tēpore, vnctæ personæ. In duabus personis præfigurabatur futurus vnus Rex & Sacerdos, utroq; munere vnus CHRISTVS; & ideo Christus à Chrismate.* Et in psal. 44. circa illa verba, *Vnxit te DEVS*, sic scribit; *Vnctum audis; CHRISTVM intellige: Etenim Christus à Chrismate. Hoc nomen quod appellatur Christus, vnctionis est; Nec in aliquo alibi ungebatur Reges & Sacerdotes, nisi in illo regno, vbi CHRISTVS prophetabatur & ungebatur, & unde venturum erat CHRISTI nomen. Nusquam est alibi omnino, in nulla gente, in nullo regno.*

20 Igitur ex sententia scripturæ & Augustini, non minus sacerdotes, quàm Reges, dicuntur *Vncti*. At inquires, non dicuntur *Christi Domini*, sicut Reges. Sed primùm, nihil hoc obstat. Non enim de

vocibus , sed de re per voces significata, disputamus. Porro hæ duæ voces, *Christus*, & *Vnctus*, eandem rem significant. Et, vt loquitur Augustinus. *Hoc nomen, quod appellatur Christus, vñtionis est.* Deinde, falsum assumis. Non solum *Vncti*, sed etiam *Christi* vocantur Sacerdotes in scripturis. Sic enim legimus 2. Machab. i. 10. *Populus, qui est Ierosolymis, & in Iudæa, Senatusque & Iudas, Aristobolo Magistro Ptolomei Regis, qui est de genere Christorum Sacerdotum, & his, qui in Ægypto sunt, Iudæis salutem & sanitatem.* Aduerte. Aristobolus est de genere Christorum Sacerdotum. Sacerdotes igitur *CHRISTI*, id est, *Vncti* vocantur. Quid vis amplius?

21. Dices. Hæc omnia intelliguntur de sacerdotibus Veteris Testamenti. Vellem autem videre locum, vbi Pontifex Noui Testamenti? (nimirum Papa) vocetur *Christus*, seu *Vnctus*. Audi. Vellem vicissim videre locum, vbi Reges Noui Testamenti vocentur eo nomine. An tibi liceat, hoc nomen, quod olim antiquis Regibus & Sacerdotibus tributum est à Spiritu sancto; ad

Re-

Regem Angliæ transferre ; & nobis non liceat , simili iure , transferre ad Pontificem ? Nimis multum tibi arrogas.

22. Addo, in Nouo Testamento, semel duntaxat reperiri hoc nomen, *Christus Domini*, in ea significatione, de qua agimus ; nempe apud Lucam cap. 2. v. 26. vbi dicitur ; *Responsum acceperat Simeon à Spiritu sancto , non visurum se mortem , nisi prius videret Christum Domini.* Hic Saluator noster appellatur *Christus Domini*, id est, *Vnctus à Domino*. Vnctus autem , & Rex , & Sacerdos, vt Augustinus supra notauit. Non oleo corporali , vt olim Reges & Sacerdotes in Veteri Testamento ; sed oleo spirituali, id est, spiritu sancto. In eo enim *requieuit Spiritus Domini , Spiritus sapientiæ & intellectus , Spiritus consilij & fortitudinis , Spiritus scientiæ & pietatis*, vt est apud Isaïam cap. 11. 3. Et hoc est, quod Dauid prædixit, psam. 44. 8. *Vnxit te DEVS, DEVS tuus, oleo latitiæ præconfortibus tuis*, id est, *DEVS vnxit te in Sacerdotē & Regem*, peculiari quodam modo, præ aliis Regibus & Sacerdotibus.

Nam te vnxit Spiritu Sancto: illos oleo tantum corporali. Hinc colligo, cum Reges & Sacerdotes Veteris Testamenti propterea vncti fuerint oleo corporali, vt essent figura seu typus futuri Messiae, qui vngendus erat in Regem & Sacerdotem oleo spiritali; eo magis hoc nomen, *Vnctus*, seu, *Christus Domini*, conuenire sacerdotibus, quàm Regibus, quo magis CHRITVS vsurpauit officium Sacerdotis, quàm Regis in hac vita. Aut certè, si æquè vsurpauit vtrunque, æquali iure, tam Sacerdotes, quàm Reges, vocari posse *Vnctos*, seu, *Christos Domini*. Nihil ergo causæ, cur hoc nomen tribui velis solis Regibus & eripi Sacerdotibus; nisi quia tibi sic visum est.

P A R A D O X V M VI.

23 **A**is, si præter Christum, etiam Pontifex esset caput Ecclesiæ, monstruosam & bicipitem fore Ecclesiam. Sic enim habes, pag. 331. *Monstruosum verò corpus, cui plus vno sit capite.* Et infra pag. 398. *Vnicum est caput vni corpori. Ecclesia vnum corpus. Nisi bicipitem aquilamingas, aut tricipitem Geryonem, cui tot capita sunt, quot*

in mitra pontificia coronæ. CHRISTVS ergo solus Ecclesiæ caput, non Papa.

24 At si ita est, vt tu hic vis; cur alibi affirmas (parum sanè tui memor) Regem esse caput Ecclesiæ? An non metuis, ne Ecclesia sit biceps, si non solus CHRISTVS, sed etiam Rex tuus, sit caput Ecclesiæ? Nam sic habes, pag. 338. *Iam verò, vt nomen capitis ad Regem reuocetur, arte mirabili nō est opus. Præiuit nobis voce Spiritus sanctus, 1. Reg. 15. 17. Nonne cum paruulus esses in oculis tuis, caput in tribubus Israel factus es? Inter tribus verò Israel, tribus Leui. caput ergo Rex vel tribus Leuitica: qua in tribu tum Pontifex Achimelech sub Rege, capite suo. Chrysostomus eandem hanc vocem capitis, reuocauit ad Theodosium, eumque dixit, non solum caput, sed quod in ipso capite maximè sublime est, capitis verticem, idque omnium in terris hominum.*

25 Miror ego tuâ inconstantiam. Dixisti paulo ante, solum CHRISTVM esse caput Ecclesiæ. Cur hoc? vt Papam, quem odisti, posses excludere. Nunc etiam Regem vis esse caput. Nec caput modo, sed verticem capitis. Cur hoc? quia Regi placere & blandiri satagis.

B 5 Ita

Ita fit, vt Ecclesiam bicipitem esse, facile patiaris, si ad Regem attendas; non autem, si ad Pontificem: Et eadem Ecclesia, nunc pulchra tibi videatur, si habeat CHRISTVM & Regem Angliæ, vt duo capita; nunc monstrosa, si CHRISTVM & Papam. Apage cum tuo capite; in quo, nunc vnum, nunc duo capita habet Ecclesia. Videtur in te quadrare illud Ecclesiastici, 27. 12. *Stultus, vt Luna, mutatur: Et Iacobi 1. 8. Vir duplex animo inconstans est in omnibus vijs suis.*

PARADOXVM VII.

26 **A**is, si Pontifex haberet potestatem deponendi Reges, meliori conditione fore Ethnicos, quàm Christianos Reges; eo quod hi deponi ab eo possint, non illi. Sic enim habes pag. 36. *Hac doctrina semel promulgata, non multa post sceptrâ, credo, CHRISTO subijcientur. Quid enim? Rex Ethnicus deponi non potest à Papa, Christianus potest: Meliori ergo iure regnatur apud Ethnicos. Quis non dehinc iam (sic vt est) manebit Ethnicus?*
Subdi-

Subditi, qui Ethnici sunt, officio suo in Reges laxari nequeunt: At Christiani queunt. Quis non subditos suos malit Ethnicos, quam Christianos? Quis Christianus Rex esse velit?

27. Nec cautè, nec Christiane loqueris. Non cautè. Primò, quia quod dixti, retorqueri potest hoc modo; Si Rex Angliæ haberet potestatem deponendi Episcopos (quod tu asseris) meliori iure essent Episcopi in Hispania, Gallia, Polonia, quàm in Anglia. Nam hic deponi possunt ad arbitrium Regis, non ibi. Secundò, quia sicut nos fatemur, Reges Christianos deponi posse à Pontifice, si delinquant, non autem Ethnicos: sic tu fateris, Reges Christianos excommunicari posse, non autem Ethnicos: At ex tuo dogmate non rectè infertur, meliori iure esse Ethnicos, quam Christianos, cum tamen plus sit, priuari bonis Ecclesiæ spiritalibus per excommunicationem; quàm priuari regno temporali per depositionem: Ergo multo minus ex nostro dogmate inferri id potest.

28 Nec Christianè. Non enim Christiani hominis est sic argumentari ; Delicta Regum puniuntur apud Christianos , non autem apud Ethnicos : Ergo malim esse Rex apud Ethnicos , ubi non punirer , si delinquerem ; quam apud Christianos, ubi punirer. Sic plane tu argumentaris. Si, inquis, Christiani Reges, quando meriti sunt, deponi possent ; Ethnici, etiamsi peccent, non tamen deponuntur : malim ethnicus esse Rex, quàm Christianus. Nimirum, satis ostendis, te pluris facere regnum temporale, quod amittere non velles ; quam cœleste, de quo non magnopere curas.

P A R A D O X V M V I I I.

29. **A**is, si Pontifex velit habere regnum temporale, suadendum ei esse, ut diabolū adeat, & ab eo petat; quippe cum ille ius habeat disponendi de regnis huius mundi. Sic enim scribis pag. 36. *Quod si Pontifici animus est ad regna mundi, est in Evangelio (memini) mentio de quodam , qui regna mundi penes se esse, eaque disponendi ius habere se dixit. Eum adeat censeo ; cum illo transigat.*

30. Ioco, an serio hoc dicis, mi homo? Vtrouis modo; vel iniurius es in tuum Regem, vel certè contumeliosus in Pontificem; quorum neutrum te decet. De iniuria in Regem, non negabis. An tu (citra iniuriam) ausus fuisses, tuo Regi, cum regnum Angliæ post mortem Elisabethæ petebat, siue ioco, siue serio respondere in hæc verba; *Si regnare vis in Anglia, diabolum adi, & cum eo transige, qui omnium regnerum distributor est?* Non opinor. Alioqui de facellis actum erat. Cur ergo Pontifici sic loqui ausus es, nisi quia in illum contumeliosus esse vis?

31. At, inquires, Pontifex quærit regnum temporale, quod illi non debetur. Contentus sit regno spiritali. Sed, quid si simile dicam de tuo Rege? Quærit primatum Ecclesiæ qui illi non debetur. Téporali regno contentus sit. Addo, plus iuris esse Pontifici in regna temporalia, quàm Regi tuo in Ecclesiam; quod alio loco demonstrandum est.

PARADOXVM IX.

32. **A**is nõ Petro Apostolo, sed Ecclesiæ datam esse potestatem excom-

communicandi, per illa verba; *Dic Ecclesie; si Ecclesiam non audierit, sit tibi sicut Ethnicus*. Itemque per illa; *Quaecumq; solueritis super terram, erunt soluta & in cœlis: & quaecumque allegaueritis super terram, erunt ligata & in cœlo*. Addis tamen, Ecclesiam posse transferre hanc potestatem, in quos voluerit. Sic enim habes, pag. 14. *Potestas hæc ibi, cui data? Non Apostolo Petro*. Et infra; *Vt autem Petro potestas ibi non data, censuram hanc usurpandi; ita nec Petro, si usurparet, ratihabitio promissa*. Dicitur enim; *Quoscumque ligaueritis. Non Petro igitur, vel Papæ; sed Ecclesie*. Et iterum pag. 42. *Res ipsa, rei ipsius promissio, ratihabitio, usus denique Ecclesie datur: ab Ecclesia, & habetur, & transfertur in unum, siue plures, qui eius post vel exercenda, vel denuncianda facultatem habeant*.

33. Ex hac tuâ doctrinâ sequitur primo, olim tempore Apostolorum, potestatem excommunicandi, immediatè datam fuisse Ecclesie Corinthiorum, & ab illa translata in Paulum Apostolum, ut eam exerceret in hominem incestuosum, & publicè denunciaret. At hoc ipsum apertè negas eodem loco, his verbis; *Paulus congregatis*

*gatis Corinthiis, potestatem censuræ denunciā-
da facit* Sanè, si Paulus congregationi, seu
Ecclesiæ Corinthiorum, facit potestatem
denūciandi censurā, vt hic affirmas; quo-
modo ipse ab eadē Ecclesia, hāc ipsam po-
testatē acceperat? Aut, quid, obsecro, ne-
cesse erat, illam dare Ecclesiæ, si iam ante
Ecclesia illam habebat, à C H R I S T O, per
illa verba, *Dic Ecclesiæ*. Hæc non cohærent.

34. Secundo sequitur, hoc tēpore in An-
glia, potestatem excōmunicandi esse im-
mediatē in Ecclesia Anglicana, non autē
in Episcopis. Ab Ecclesia tamē eam dari
posse Episcopis. At si ita est, cur Ecclesia
Anglicana nō dat Regi, primati suo, hanc
potestatē? cur potius dat Episcopis, quàm
Regi, cū Episcopi subiecti sint Regi in
Iurisdictione Ecclesiastica, vt vos vultis?
An nō turpe est, vos potestatē facere Epi-
scopis, vt possint Regē suū, caput suū, Pa-
storē suū & Primatē excōmunicare, & ex-
tra Ecclesiā eiicere: Et nolle eandē pote-
statem facere Regi, vt possit subditos suos
eadē pœna coercere? Certè aut valdè iniq̃
estis in Regē vestrū; aut nō serio, Prima-
tum Ecclesiæ illi tribuitis. Alterutrū neces-
se est. Tu nunc vide, quo spiritu illa verba
à te scripta sint,

vocibus , sed de re per voces significata, disputamus. Porro hæ duæ voces, *Christus*, & *Vnctus*, eandem rem significant. Et, vt loquitur Augustinus. *Hoc nomen, quod appellatur Christus, vñtionis est.* Deinde, falsum assumis. Non solum *Vncti*, sed etiam *Christi* vocantur Sacerdotes in scripturis. Sic enim legimus 2. Machab. i. 10. *Populus, qui est Ierosolymis, & in Iudæa, Senatusque & Iudas, Aristobolo Magistro Ptolomei Regis, qui est de genere Christorum Sacerdotum, & his, qui in Ægypto sunt, Iudæis salutem & sanitatem.* Aduerte. Aristobolus est de genere Christorum Sacerdotum. Sacerdotes igitur *CHRISTI*, id est, *Vncti* vocantur. Quid vis amplius?

21. Dices. Hæc omnia intelliguntur de sacerdotibus Veteris Testamenti. Vellem autem videre locum, vbi Pontifex Noui Testamenti? (nimirum Papa) vocetur *Christus*, seu *Vnctus*. Audi. Vellem vicissim videre locum, vbi Reges Noui Testamenti vocentur eo nomine. An tibi liceat, hoc nomen, quod olim antiquis Regibus & Sacerdotibus tributum est à Spiritu sancto; ad

Re-

Regem Angliæ transferre ; & nobis non liceat , simili iure , transferre ad Pontificem ? Nimis multum tibi arrogas.

22. Addo, in Nouo Testamento, semel duntaxat reperiri hoc nomen, *Christus Domini*, in ea significatione, de qua agimus ; nempe apud Lucam cap. 2. v. 26. vbi dicitur ; *Responsum acceperat Simeon à Spiritu sancto, non visurum se mortem, nisi prius videret Christum Domini.* Hic Saluator noster appellatur *Christus Domini*, id est, *Vnctus à Domino.* Vnctus autem, & Rex, & Sacerdos, vt Augustinus supra notauit. Non oleo corporali, vt olim Reges & Sacerdotes in Veteri Testamento ; sed oleo spirituali, id est, spiritu sancto. In eo enim *requieuit Spiritus Domini, Spiritus sapientiæ & intellectus, Spiritus consilij & fortitudinis, Spiritus scientiæ & pietatis*, vt est apud Isaiam cap. 11. 3. Et hoc est, quod Dauid prædixit, psam. 44. 8. *Vnxit te DEVS, DEVS tuus, oleo latitiæ preconsortibus tuis*, id est, *DEVS vnxit te in Sacerdotē & Regem*, peculiari quodam modo, præ aliis Regibus & Sacerdotibus.

Nam te vnxit Spiritu Sancto: illos oleo tantum corporali. Hinc colligo, cum Reges & Sacerdotes Veteris Testamenti propterea vncti fuerint oleo corporali, vt essent figura seu typus futuri Messiae, qui vngendus erat in Regem & Sacerdotem oleo spiritali; eo magis hoc nomen, *Vnctus*, seu, *Christus Domini*, conuenire sacerdotibus, quàm Regibus, quo magis CHRITVS vsurpauit officium Sacerdotis, quàm Regis in hac vita. Aut certè, si æquè vsurpauit vtrunque, æquali iure, tam Sacerdotes, quàm Reges, vocari posse *Vnctos*, seu, *Christos Domini*. Nihil ergo causæ, cur hoc nomen tribui velis solis Regibus & eripi Sacerdotibus; nisi quia tibi sic visum est.

P A R A D O X V M VI.

23 **A**is, si præter Christum, etiam Pontifex esset caput Ecclesiæ, monstrosam & bicipitem fore Ecclesiam. Sic enim habes, pag. 331. *Monstruosum verò corpus, cui plus vno sit capite*. Et infra pag. 398. *Vnicum est caput vni corpori. Ecclesia vnum corpus. Nisi bicipitem aquilamingas, aut tricipitem Geryonem, cui tot capita sunt, quot*
in

in mitra pontificia corona. CHRISTVS ergo solus Ecclesiæ caput, non Papa.

24 At si ita est, ut tu hic vis; cur alibi affirmas (parum sanè tui memor) Regem esse caput Ecclesiæ? An non metuis, ne Ecclesia sit biceps, si non solus CHRISTVS, sed etiam Rex tuus, sit caput Ecclesiæ? Nam sic habes, pag. 338. *Iam verò, ut nomen capitis ad Regem reuocetur, arte mirabili nō est opus. Præiuit nobis voce Spiritus sanctus, 1. Reg. 15. 17. Nonne cum paruulus esses in oculis tuis, caput in tribubus Israel factus es? Inter tribus verò Israel, tribus Leui. caput ergo Rex vel tribus Leuitica: qua in tribu tum Pontifex Achimelech sub Rege, capite suo. Chrysostomus eandem hanc vocem capitis, reuocauit ad Theodosium, eumque dixit, non solum caput, sed quod in ipso capite maximè sublime est, capitis verticem, idque omnium in terris hominum.*

25 Miror ego tuam inconstantiam. Dixisti paulo ante, solum CHRISTVM esse caput Ecclesiæ. Cur hoc? ut Papam, quem odisti, posses excludere. Nunc etiam Regem vis esse caput. Nec caput modo, sed verticem capitis. Cur hoc? quia Regi placere & blandiri satagis.

Ita fit, vt Ecclesiam bicipitem esse, facile patiaris, si ad Regem attendas; non autem, si ad Pontificem: Et eadem Ecclesia, nunc pulchra tibi videatur, si habeat CHRISTVM & Regem Angliæ, vt duo capita; nunc monstrosa, si CHRISTVM & Papam. Apage cum tuo capite; in quo, nunc vnum, nunc duo capita habet Ecclesia. Videtur in te quadrare illud Ecclesiastici, 27. 12. *Stultus, vt Luna, mutatur: Et Iacobi 1. 8. Vir duplex animo inconstans est in omnibus vijs suis.*

PARADOXVM VII.

26 **A**is, si Pontifex haberet potestatem deponendi Reges, meliori conditione fore Ethnicos, quàm Christianos Reges; eo quod hi deponi ab eo possint, non illi. Sic enim habes pag. 36. *Hac doctrina semel promulgata, non multa post sceptrâ, credo, CHRISTO subijcientur. Quid enim? Rex Ethnicus deponi non potest à Papa, Christianus potest: Meliori ergo iure regnatur apud Ethnicos. Quis non dehinc iam (sic vt est) manebit Ethnicus?*
Subdi-

Subditi , qui Ethnici sunt , officio suo in Reges laxari nequeunt : At Christiani queunt. Quis non subditos suos malit Ethnicos, quam Christianos ? Quis Christianus Rex esse velit ?

27. Nec cautè, nec Christiane loqueris. Non cautè. Primò, quia quod dixti, retorqueri potest hoc modo ; Si Rex Angliæ haberet potestatem deponendi Episcopos (quod tu asseris) meliori iure essent Episcopi in Hispania, Gallia, Polonia, quàm in Anglia. Nam hic deponi possunt ad arbitrium Regis, non ibi. Secundò, quia sicut nos fatemur , Reges Christianos deponi posse à Pontifice , si delinquant , non autem Ethnicos : sic tu fateris , Reges Christianos excommunicari posse, non autem Ethnicos : At ex tuo dogmate non rectè infertur , meliori iure esse Ethnicos , quam Christianos , cum tamen plus sit, priuari bonis Ecclesiæ spiritalibus per excommunicationem ; quàm priuari regno temporali per depositionem : Ergo multo minus ex nostro dogmate inferri id potest.

28 Nec Christianè. Non enim Christiani hominis est sic argumentari ; Delicta Regum puniuntur apud Christianos , non autem apud Ethnicos : Ergo malim esse Rex apud Ethnicos , ubi non punirer , si delinquerem ; quam apud Christianos, ubi punirer. Sic plane tu argumentaris. Si, inquis, Christiani Reges, quando meriti sunt, deponi possent ; Ethnici, etiamsi peccent, non tamen deponuntur : malim ethnicus esse Rex, quàm Christianus. Nimirum, satis ostendis, te pluris facere regnum temporale, quod amittere non velles ; quam cœleste, de quo non magnopere curas.

P A R A D O X V M V I I I.

29. **A**is, si Pontifex velit habere regnum temporale, suadendum ei esse, ut diabolū adeat, & ab eo petat; quippe cum ille ius habeat disponendi de regnis huius mundi. Sic enim scribis pag. 36. *Quod si Pontifici animus est ad regna mundi, est in Evangelio (memini) mentio de quodam , qui regna mundi penes se esse, eaque disponendi ius habere se dixit. Eum adeat censeo ; cum illo transfigat.*

30. Ioco, an serio hoc dicis, mi homo? Vtrouis modo; vel iniurius es in tuum Regem, vel certè contumeliosus in Pontificem; quorum neutrum te decet. De iniuria in Regem, non negabis. An tu (citra iniuriam) ausus fuisses, tuo Regi, cum regnum Angliæ post mortem Elisabethæ petebat, siue ioco, siue serio respondere in hæc verba; *Si regnare vis in Anglia, diabolum adi, & cum eo transige, qui omnium regnorum distributor est?* Non opinor. Alioqui de sacellis actum erat. Cur ergo Pontifici sic loqui ausus es, nisi quia in illum contumeliosus esse vis?

31. At, inquires, Pontifex quærit regnum temporale, quod illi non debetur. Contentus sit regno spiritali. Sed, quid si simile dicam de tuo Rege? Quærit primatum Ecclesiæ qui illi non debetur. Téporali regno contentus sit. Addo, plus iuris esse Pontifici in regna temporalia, quàm Regi tuo in Ecclesiam; quod alio loco demonstrandum est.

PARADOXVM IX.

32. **A**is nō Petro Apostolo, sed Ecclesiæ datam esse potestatem ex-
com-

*gatis Corinthiis, potestatem censura denunciã-
da facit* Sanè, si Paulus congregationi, seu
Ecclesiæ Corinthiorum, facit potestatem
denúciandi censurã, vt hic affirmas; quo-
modo ipse ab eadẽ Ecclesia, hãc ipsam po-
testatẽ acceperat? Aut, quid, obsecro, ne-
cessẽ erat, illam dare Ecclesiæ, si iam ante
Ecclesia illam habebat? à C H R I S T O, per
illa verba, *Dic Ecclesiæ*. Hæc non cohærent.

34. Secundo sequitur, hoc tẽpore in An-
glia, potestatem excõmunicandi esse im-
mediatè in Ecclesia Anglicana, non autẽ
in Episcopis. Ab Ecclesia tamẽ eam dari
posse Episcopis. At si ita est, cur Ecclesia
Anglicana nõ dat Regi, primati suo, hanc
potestatẽ? cur potius dat Episcopis, quàm
Regi, cùm Episcopi subiecti sint Regi in
Iurisdictione Ecclesiastica, vt vos vultis?
An nõ turpe est, vos potestatẽ facere Epi-
scopis, vt possint Regẽ suũ, caput suũ, Pa-
storẽ suũ & Primatẽ excõmunicare, & ex-
tra Ecclesiã eiicere: Et nolle eandẽ pote-
statem facere Regi, vt possit subditos suos
eadẽ pœna coercere? Certè aut valdè iniqui
estis in Regẽ vestrũ; aut nõ serio, Prima-
tum Ecclesiæ illi tribuitis. Alterutrũ neces-
se est. Tu nunc vide, quo spiritu illa verba
à te scripta sint,

pag. 151. *Nos Principi censuræ potestatem non facimus. Et quare non facitis, si verè Pastorem & primatem agnoscitis? Sed pergo.*

P A R A D O X V M X.

35 **A**Is, Prophetiam Apocalypsis de Antichristo, iam impletam esse, ac proinde tam claram, ut oculis usurpari possit. Sic enim habes pag. 186. *Minimè verò mirum, si ista, quæ dixi, tam vel claram, vel certam in Scripturis Patrum interpretationem non habeant. Signatus ad huc liber huius prophetiæ erat. Et paulo post; Mirari tamen non debeat quis, si non illis tum adeò explicita omnia fuerint, quàm Nobis, per DEI gratiam, iam sunt, qui consummatam iam prophetiam illam quotidie oculis usurpamus.*

36. Itanè vero? At Rex tuus contrarium sentit. Nam in sua monitoria Præfatione disertè ait, prophetiam illam de Antichristo obscuram adhuc esse & involutam; & per solas coniecturas de illa disputari posse. Verba eius sunt hæc; *Sanè, quod ad definitionem Antichristi, nolo rem tam obscuram & involutam tanquam omnibus*
Christia-

Christianis ad credendum necessariam urgere.

An, quod Regi tuo obscurum & inuolutum est, tibi quotidie oculis vsurpatur? Non credam. Pergit Rex; *Id autem maxime mihi in votis est, ut si cui hanc meam de Antichristo coniecturam libebit refellere, singulis disputationis mee partibus ordine respondeat.* Tibi, Sacellane, necesse non est, singulis respondere. Vno verbo rem conficies, si dixeris; *Domine Rex, erras de coniectura: quod oculis vsurpatur, extra coniecturam est. Nos omnes oculis quotidie vsurpamus mysterium Antichristi: Tu solus, in Anglia, non vides? Vicisti.*

37. Nec Regi modo, sed & tibi ipsi contrarius es. Nam si prophetia de Antichristo iam consummata est, & oculis omnium vsurpatur, ut tu asseris; quis tandem est Antichristus ille, de quo prophetia loquitur? Papa, inquires. Hoc enim & Rex tuus, non quidem oculis vsurpat, sed tamen coniectat. Sit ergo ita. At alibi dicis, Regem tuum à Papa excommunicari posse, quamuis non regno priuari. An ergo Antichristus Regem tuum excommunicare potest? Vide, quid dicas. Et caue, ne dum adulando placere vis Regi; per imprudentiam displiceas.

38. **A** Is, Reges Daniæ & Suetiæ, nec
 nō Principes Germaniæ cum mul-
 tis aliis, idem sentire in rebus fidci, quod
 Rex Angliæ sentit. Nam pag. 53. sic scri-
 bis; *Quod si præsentis instituti foret, edoceri
 posses, serenissimum magnæ Britannia Regem,
 & qui cum eo sentiunt, Reges Dania & Suetia,
 Germania Principes, Respublicas Heluetia &
 Rhetia, quicq; per Galliam, Belgium, Poloniam,
 Hungariam, Bohemiam, Austriam, Ordines à
 nobis sunt, partem esse dominici gregis, nec mi-
 norem, nec minus illustrem partem, quàm quæ
 est pars Pauli Quinti.*

39. Etiam si præsentis instituti esset, nun-
 quam edocere posses, quæ hic scribis.
 Hoc sigillatim tibi ostendam. Primum
 ais, Regem tuum consentire cum Regi-
 bus Daniæ & Suetiæ. At, qui hoc fieri
 potest? Reges illi Lutherani sunt, & re-
 alem CHRISTI in Eucharistia præsen-
 tiam agnoscunt; quam Rex tuus omni-
 no pernegat. Secundò, idem affirmas
 de Principibus Germaniæ, & aliarum
 Prouinciarum ordinibus. At hi ipsi in-
 ter se non consentiunt, cùm alij aper-
 tè Lutherani, alij Calvinistæ sint. Quo-
 modo

modo ergo, dissecuti inter se, cum Rege tuo conspirare possunt? Nisi Rex tuus (quod insinuas) cum Calvinistis profiteatur Religionem Calvinisticam, & cum Lutheranis Lutheranam: *omnibus omnia factus, ut omnes lucrifaciat.* Tercio. Estotamen, quod non est: Et hi omnes, tam Lutherani, quàm Calvinistæ consentiant inter se, & cum tuo Rege; quomodo verum erit, quod addis, *partem esse dominici gregis?* Non capio hoc. Non, inquam, capio, quomodo sint pars gregis, & non totus grex. Vel enim præter eos, qui à te nominati sunt, adhuc alij pertinent ad dominicum gregem, vel nulli. Si alij, quare non nominasti? aut qui illi sunt? Non opinor, ex tua sententia, Pontificios aut Anabaptistas esse. Hoc enim non pateris. Si nulli, præter illos, quare partem gregis dominici, & non potius gregem nominasti? Dicam clarius. Si Reges Angliæ, Daniæ, Suctiæ, & alij Principes ac ordines, qui cum illis consentiunt, sunt pars gregis dominici; & non totus grex; necesse est, præter eos, aliam esse partem gregis dominici, quæ cum illis non con-

sentiat: ac proinde totum Christi ouile constare duabus partibus, quarum altera ab altera dissecta sit. Itane sentis? Si non; explica te melius.

40. Sed demus hoc quoque. Sint pars gregis dominici, qui cum Rege tuo sentiunt. Qua fronte, addis, partem illam, *nec minorem, nec minus illustrem esse, quàm quæ est pars Pauli Quinti?* Hoc minus capio. Cum Paulo Quinto sentiunt Rodolphus Imperator, Reges Hispaniæ, Galliæ, Poloniæ; Archiduces Austriæ; Principes Electores, Moguntinus, Treuirensis, Coloniensis; Duces Bauariæ, Lotharingiæ, Brabantæ, Franconiæ, Hetruriæ; Episcopi, Bambergensis, Constantiensis, Spirensis, Vormatiensis, Paderbornensis, &c. ut multos alios omittam. Et tu audes scribere, hanc esse minus, aut certè non magis illustrem partem, quàm quæ tuo Regi consentit in Religione? Nimis intemperans es in asseuerando. Et Rex tuus, quia stipes non est, facile aduertet, palpum sibi à te obtrudi.

41. **A**ls, Regi Angliæ non esse iam liberum, mutare religionem, aut Catholicam in suo regno admittere, eo quod bis iurauerit, se id non facturum. Sic enim habes pag. 81. *Nec in eo Regi audiendus, quod consilium das de Religione liberè habenda: integrum hoc iam illi non est. Nam non semel periurus sit, quin bis, si te audiat. Qua enim (si qui est fidei bis data conscientia) vel conscientia, vel fide, ferret in regnis suis ritus vestros, vel usum eorum publicum, qui suscepta primum Scotiæ, suscepta deinde Angliæ coronâ regiâ, utrobique solenni ritu, DEO iusiurandum prestitit de conservanda in statu suo illâ colendi DEI formula, nec aliâ, quàm quæ in regnis suis tum publicè recepta, & utriusque gentis legibus stabilita esset?*

42. Nimirum, ut video, minaris Regi, fore, ut periurus à te habeatur, si Religionem Catholicam in suo Regno admittat, aut suam deserat, & aliam amplectatur. An ergo putas, nemini integrum esse, mutare Religionem, si iurauerit se non mutaturum? Ita apparet. At, si falsa sit Religio, quam iuravit se servaturum, quid

tunc ager? Persistet potius in falsa religione, quàm iuramentum violet? Cauere dixeris. *Iuramentum*, aiunt Iureconfulti, *non est vinculum iniquitatis*. Addo ego, *nec falsitatis*. Igitur, non obstante iuramento, quantumuis sæpè repetito, potest quis mutare Religionem, si falsa sit: potest rescindere pactum, si iniquum. Nihil certius. Quid ergo iam ageres, si Rex tuus diceret, religionem illam, quam modo profitetur, falsam esse? An vrgeres iuramentum? At hoc nullum est in re mala. An suaderes, vt abiectâ falsâ, veram amplecteretur? Benè quidem. Sed cur hoc dissimulas? Cur tantopere vrges iuramentum, quasi nunquam vllò casu vel euentu licitum sit, mutare religionem, quæ iuramento firmata est, etiam si impia sit? Colligete melius, & tunc loquere.

43. Adhuc vnum abs te quero. Rex tuus in Monitoria Præfatione, hortatur Reges & Principes Catholicos, vt desertâ sua fide ac religione, quam hætenus sub Pontifice professi sunt, amplectantur Anglicanam, quam ipse profitetur. Constat autem plerosq; illorum, in susceptio-

ne Regni, iuramentum præstitisse, nunquam se id facturos. Hic quæro, inquam, an Rex tuus legitimè ac prudenter eos hortatus sit, vt hoc facerent, nec ne? Si legitimè ac prudenter egit, cur accusas Catholicos, qui in meliori causa simile quid faciunt? Si illegitimè ac imprudenter, cur non monuisti, vt abstineret, cum illi a sacello sis, & fortasse à calamo? Vbiq; impingis.

PARADOXVM XIII.

44.

Als Bellarminum esse votifragum, eo quod ex Iesuita factus sit Cardinalis. Sic enim habes

pag. 56. *At votum non video cur a Mattheo (Torto) nominari debuit, nisi si interposita voti mentione, Domino suo (Bellarmino) gratificari voluit, qui olim Iesuita factus, voti se reum fecit, & hoc votum iam fregit, postquam ostrum induit.*

45 Nequè, ut apparet, intelligis, quid sit Votifragum esse, ac, quid sit, Periu-
rum esse. Et sicut paulo ante volebas Regem tuum ptonunciare periurum, si Religionem Catholicam in suo regno admit-
teret; ita nunc Bellarminum pronuncias voti-

fragum, quia dignitatem Cardinalitiam inuitus admisit. Certè, ad conuitiandum valde propensus es. Et cur obsecro Lutherum non dicis Votifragum, qui ex Monacho factus est Maritus? (si tamen Maritus, & non potius sacrilegus fornicator aut adulter) cur non periuurum, qui abiecta antiqua fide, quam à Christo, Apostolis & Maioribus suis sanctissimis simul ac doctissimis acceptam, iuramento firmauerat; nouitiam, CHRISTO & veritati repugnantem, amplexus est?

46. Vt rem intelligas, sic accipe. Aliud est, absolutè & simpliciter aliquid vouere, seu DEO promittere; aliud verò, cum certa limitatione. Qui priori modo vouet, tenetur præstare, quod promittit. Qui posteriori, potest solui obligatione, quando limitatio patitur. Exempla habemus in Veteri Testamento. Nam filiae & vxores vouebant cum hac limitatione, si parentes & mariti consentirent, (Num. 30.) Nazaræi cum hac, vt certo duntaxat tempore, & non omni vita, vellet se obstringere (Num. 6.) Simili modo fit in nostra Societate. Qui simplici voto se obstringit, non aliter censetur obstrictus,

ctus, quàm ad arbitrium Superiorum. Vnde, si superiores ex iusta causa dimittant illum à Societate, cessat obligatio. Qui autem solenni Voto se obstringit, pendet ex arbitrio Papæ, qui illum potest eripere Societati, & in alio statu collocare. Et quid hoc noui est? Quotidie apud vos similia fiunt. Promittitis Regi vestro fidelitatem & obedientiam, sed cum hac duplici limitatione. 1. quam diu manetis in Anglia, 2. quam diu Rex non mutat Religionem. Si secus fiat, putatis vos non obstringi.

PARADOXVM XIII.

47. **A**ls, Catholicos docere, fidem non esse seruandam & perfidiam esse licitam. Sic enim habes pag. 136. *Vos, qui fidem non seruandam, id est, perfidiam licitam legitimamque docetis; etiamne vos quicquam de perfidia audetis hiscere? & in turpitudinem vestram, etiam vel nomen nominare?*

48. At, mi homo, qui sunt illi apud nos, qui sic docent? Si nihil aliud, quam mentiri & calumniari, propositum tibi est, non magnopere miror, te ista scribere. Est enim (quod pace tua dixerim) luculentum

mendacium, & aperta calumnia. Si autem veritatis studiosus es, (vt te esse oportuit) cur rem non prius examinasti? Inueniffes, sine dubio, aliam doctrinam apud Catholicos. Et si adhuc lubet, videre potes, quæ de hoc argumento à me pridem scripta sunt in disputatione, *De fide hereticis seruanda*: & in *Questionibus Miscellaneis* de eadem materia. Ibi inuenies, quid Catholici verè sentiant; quid Adversarij falso calumnientur.

P A R A D O XVM XV.

49. **A** Is Catholicos esse de prosapia Malchi, eo quod omnia audiant & interpretentur sinistrâ aure; nihil dextrâ. Sic enim habes pag. 92. *Intereatamen dextrâ datum, dextrâ positum, quicquid in Iuramento positum. Quod dextra datum est, vos sinistrâ accepistis, & de Malchi prosapia estis, cui præcisa auris dextra: nec vlla vobis auris reliqua, nisi sinistra, qua auditis omnia; omnium, quæ à nobis dicuntur, sinistri auditores & interpretes.*

50. More tuo, vel nugari pergis, vel contumeliam inferre. Sed non laboro. Faciamus esse, quod dicis. Catholici sint de pro-

profapia Malchi. Quid hinc efficis? Nihil sanè contra nos. An nescis ex Evangelio, Malcho mox, vt abscissa est auricula dextra, à C H R I S T O restitutam esse? Et ideo restitutam esse, vt nihil sinistrâ, sed omnia, quæ audiret, dextrâ interpretaretur? Si ergo nos de profapia Malchi esse vis, fateri debes, ita nobiscum actum esse à C H R I S T O, vt omnia dextris auribus, nihil solis sinistris audiamus & interpretemur,

51. Quod si vicissim luberet iocari, non dicerem vos esse de profapia Malchi, cui auris abscissa est, sed de profapia Iudæorum, qui aures habent, & non audiunt, iuxta illud Matth. 13. 14. *Audit u audietis, & non intelligetis, & videntes videbitis, & non videbitis. Incrassatum est enim cor populi huius, & auribus grauiter audierunt & oculos suos clauferunt.* Et quæ sequuntur. Sed nolo vobiscum sic agere.

*De primatu Regis Malè defen-
so à Sacellano.*

I. **Q**uia semel propositum tibi est, Re-
gi adulari; quicquid illi placere
nolsti, omnino tueri & approbare vis. Hoc
animo & affectu, Primatum Ecclesiæ,
quem ipse sibi usurpat, propugnare ausus
es. Sed infelici sanè euentu. Dupliciter
enim peccas in hoc genere. Primo, quia
multa suppeditas argumenta, quæ euer-
tunt Primatum Regis; quod tamen per
imprudentiam à te factum est. Secundo,
quia quæ adfers pro primatu Regis, tam
parui momenti sunt, ut res abeat in con-
temptum. Vtrumque tibi ostendam.
Quod ad prius attinet, ex tuis principiis
colligi possunt hæc argumenta contra
Primatum Regis.

I. ARGUMENTVM

*Contra Primatum Regis ex
Sacellano.*

2. **P**rimum argumentum sic instituo.
Ille non habet Primatum Ecclesiæ,

qui nullam habet iurisdictionem Ecclesiasticam, nec in foro interiori, nec exteriori: At Rex, ex tua doctrina, nullam habet iurisdictionem Ecclesiasticam, nec in foro interiori, nec in exteriori: Ergo non habet Primatum Ecclesiæ. Maior propositio per se nota est; quia nomine Primatus Ecclesiæ, nihil aliud hoc loco intelligimus, quam supremam Iurisdictionem Ecclesiasticam. Qui ergo nullam habet Iurisdictionem Ecclesiasticam, nec internam, nec externam, non habet primatum Ecclesiæ. At Rex, ex tua doctrina, nullam habet.

3. Non internam. Hæc enim consistit in potestate clauium, seu potestate remittendi peccata in foro conscientiæ, quam Rex non habet, vt fateris pag. 380. his verbis: *Rex non assumit Ius clauium.* Et merito. Non enim Regibus, sed Apostolis dictum est à CHRISTO, *Accipite spiritum sanctum: quorum remiseritis peccata, remissa sunt eis; & quorum retinueritis, retenta sunt.*

4. Nec externam. Hoc euidenter conuincam ex tuis principiis. Sunt autem

tem

tem hæc tria. Primum, quod Iurisdicção Ecclesiastica fori exterioris, non alio loco fundata sit, quàm illo Matthæi 18. 17. *Dic Ecclesiæ: si Ecclesiam non audierit, sit tibi sicut Ethnicus & Publicanus.* Alterum, quod Iurisdicção, quæ illo loco fundata est, nihil aliud sit, quàm Ius censuræ, seu potestas excommunicandi. Tertium, quod Rex non habeat Ius censuræ, seu potestatem excommunicandi. Agnoscis, credo, hæc tua principia. Et quidem hoc tertium habes pag. 151. his verbis; *Nos Principi potestatem censuræ non facimus.* Et iterum pag. 380. *Rex non assumit ius censuræ.* Duo vero priora, pag. 41. his verbis; *Censura duplex est; Publicani & Ethnici; minor & maior. Minor à Sacramentis excludit modo. De maiore verò, quæ arcet Ecclesiâ ipsa, quæ perinde reddit, ut Ethnicos, vix quisquam est, quin fateatur, institutam eam à CHRISTO, Matth. 18. Per verba, Dic Ecclesiæ: si Ecclesiam non audierit, sit tibi sicut Ethnicus. De exteriori foro ibi agitur. Exterioris fori Iurisdicção, illo, nec alio loco fundata est. Attende quid hic dicas. Iurisdicção fori exterioris, ubi fundatur in Euangelio?*

Non

Nō alibi, inq̃s, quā̃m Matt. 18. Bene habet-
 5. Hinc iam ita concludo. Omnis Iu-
 risdictio Ecclesiastica fori exterioris,
 fundatur in illo solo loco; *Dic Ecclesia*: At
 Iurisdictionem illo loco fundatam non
 habet Rex: Ergo nullam habet funda-
 tam in Evangelio CHRISTI, sed in cere-
 bro Sacellani. Vide nunc, quid acturus sis
 cum Rege, qui per tuam doctrinam, omni
 Ecclesiastica potestate spoliatus est. Et re-
 uoca illa tua verba, quæ scripsisti pag. 90.
Primatus spiritualis debetur Regibus omni iure.
 Non sanè *omni iure*, quia vt iam fassus
 es, non iure Evangelico, seu noui Testa-
 menti.

II. ARGVMENTVM

6. **A**Lterum, nec minus efficax argu-
 mentum, est huiusmodi. Is non
 habet Primatum Ecclesiæ, qui neminem,
 quantumvis reum ac nocentem, potest
 expellere ab Ecclesia, & tamen ipse, si no-
 cens sit, ab aliis expelli potest: Vel quod
 idem est, qui neminem potest excommu-
 nicare, & tamen ipse ab aliis excommu-
 nicari potest. At Rex, iuxta tuam doctri-
 nam, neminē potest excommnicare, seu
 eiice-

eiicere ex Ecclesia; & tamen ipse ab aliis excommunicari seu eiici potest: Ergo, iuxta tuam doctrinam, non habet Primatum Ecclesiæ.

7. Maior certa est. Et patet in simili exemplo. Nam sicut is non censetur Rex, qui neminem, quantumvis flagitiosum, potest è regno proscribere, & in exilium mittere; & tamen ipse ab aliis, si deliquerit, proscribi, & in exilium mitti potest; sic planè se res habet in nostro casu. Nunc subsumo. At Rex neminem potest excommunicare, seu ab Ecclesia arcere, quia *non habet Ius censure*, ut tu loqueris: Et tamen ab aliis potest excommunicari, seu ab Ecclesia arceri, ut fateris, pag. 39. his verbis; *Aliud est priuare Regem bonis Ecclesiæ communibus, quod facit sententia, & potest forte Pontifex: aliud, priuare bono proprio, id est, regno suo, quod non facit sententia, nec potest Pontifex. Priuabit censura Pontificis societas fidelium, qua fideles sunt; bonum enim illud spirituale & ab Ecclesia: Non priuabit obedientia subditorum, qua subditi sunt: Bonum enim ciuile hoc, nec ab Ecclesia.* Concludo. Ergo Rex, ex tua sententia, non habet Primatum Ecclesiæ.

8. Atque

8. Atque hoc ipso argumento, quod ex tua doctrina sumptum est, non solum probo, Regem non habere Primatum Ecclesiæ; sed etiam Regem longè aliter sentire, quam tu sentis. Tu enim fateris, ut ex citatis verbis patet, Regem à Pontifice excommunicari posse: Ergo etiam fateri debes, Regem in hoc casu inferiorem esse Pontifici. At Rex tuus in Monitoria Præfatione, id negat his verbis; *Nam neque me Pontifice ulli ex parte inferiorem esse credo, pace illius dixerim.* Si nulla ex parte inferior est, quomodo excommunicari seu puniri ab eo potest? Vide, quo pacto salves hic tuum Regem.

III. ARGVMENTVM.

9. **T**ertium argumentum fundatur in illis tuis verbis, pag. 177. *Duo hæc regna, Reipublicæ & Ecclesiæ, quam diu duo manent, hoc ab illo diuisum, duos habent: p s t quam in unum coalescunt, non ut in duobus duo, sed ut in uno vnus Primus est.* Vis hoc dicere; In hoc mundo, duo esse regna distincta, vnum Reipublicæ ciuiliis, alterum Ecclesiæ CHRISTI: Hæc quam diu manent duo, habere duos Primates, seu
D supre-

supremos Principes: quando autem in vnum coalescunt, non habere nisi vnum Primatem, seu supremum Principem. Accipio, quod das; & subsumo. At in noua Lege, quam CHRISTVS instituit, manent duo, nec in vnum coalescunt: Ergo in noua Lege, debent esse duo distincti Primates, quorum alter præsit Ecclesiæ, alter Reipublicæ civilis. Ergo Rex Angliæ, si pertinet ad nouam Legem, non præest vtrique simul.

10. Quid potes hic tergiversari? Dic obsecro, an tempore CHRISTI, qui nouam legem instituit, fuerint diuisa hæc duo regna, an verò in vnum coaluerint? Hoc posterius, nec potes, nec audes affirmare; quia si Ecclesia & Respublica in vnum coaluissent tempore CHRISTI, iam vnus vtriusque fuisset primas, iuxta tuam doctrinam. Vel ergo CHRISTVS fuisset simul Primas Ecclesiæ & Reipublicæ; quod minimè concedis: vel neutrius fuisset, quod est contra scripturam. Superest ergo, vt tempore CHRISTI fuerint diuisa illa duo regna, ac proinde habuerint duos

duos diuersos Primates : Ecclesia quidem CHRISTVM ; Respublica verò Regem vel Imperatorem.

II. Iam verò , si tempore CHRISTI, non fuit vnus idemque primas Ecclesiæ & Reipublicæ , quod fateri debes ; quomodo Rex tuus , qui CHRISTI institutum profitetur , vtrunque Primatum vsurpare sibi audet ? Nisi dicas , eum id facere ex more Iudæorum , non Christianorum ; ideoque in hac re Iudæis similem esse , non Christianis. Hoc enim videris velle , cum agis , pag. 363.

Amore institutoque Isaacis orditur Apologia ; inde enim vim habet , atque nervos suos quæstio hac omnis (nempe de Primatu) In Israele enim populo suo , regnum instituit DEVS , & Ecclesiam in regno , ex mente sua. Exemplum inde nobis sumendum est cum in Testamento Novo nullum habeamus. Nusquam ibi in vnum coalescunt Ecclesia & Imperium.

12. Ex hac , tam luculenta tua confessione , duo colligo. Vnum est , Regem Angliæ sine vlllo exemplo Noui Testamenti , vsurpare sibi vtrunq ; Prima-

tum, Reipublicæ & Ecclesiæ. Alterum, vel Regē Angliæ, vel alios Reges & Imperatores in errore versari. Nam si, vt tu loqueris, nusquam in nouo Testamento Ecclesia & Imperium in vnum coaluerunt; & iā tandem in Anglia in vnum coalescunt; necesse est, vel hæctenus erratum esse ab omnibus, & vestrum Regem cœpisse primum sapere; vel certè, quod credibilius est, alios in hoc genere sapuisse; vestrum Regem à meta aberrare.

13. Video quid obiici possit. Hoc nimirum, quod etiam Pontifex in parte Italiæ vsurpet vtrunque Primatum, Reipublicæ & Ecclesiæ. Fateor ita esse. Sed illa coniunctio, iure tantum humano introducta est. Tu autem contendis, Regem Angliæ habere vtrunque Primatum iure diuino. Hoc probare non potes.

IV. ARGVMENTVM.

14. **Q**uartum argumentum suppeditas, pag. 35. & 36. cum ais; *Christus enim, cuius hic vicē obtendis, non sic præfuit, dū in terris fuit. Regnū, quod de mundo fuit, non habuit: Regni, q̄ non habuit, vices non cōmisit.* Et paulo post, *Est ille quidem Rex Regum, sed quā Re-*
gum

*gum Rex est, immortalis est; mortalem nullum
Proregem habet. Papa mortalis ipse, non aliter
Christi Vicarius, quàm quàm mortalis Christus.*

15. His verbis conaris probare, Pontificem, tametsi CHRISTI vicarius sit, non tamen habere regnum temporale. Supponis autem dupliciter spectari posse CHRISTVM. 1. quatenus est immortalis, seu secundum diuinitatem. 2. quatenus est mortalis, seu secundum humanitatem. Hoc posito, sic argumentaris; CHRISTVS secundum diuinitatem, seu, quatenus est immortalis, est quidem Rex Regum, & habet omnia regna huius mundi in sua potestate, non tamen habet vllum vicarium mortalem: At Papa mortalis est: Ergo nō est Vicarius CHRISTI, quatenus hic immortalis, seu DEVS est. CHRISTVS porro secundū humanitatem, seu quatenus mortalis est, non habet vllum regnum temporale: Ergo non potest habere vllum Vicarium in regno temporali: Ergo Papa, licet Vicarius illius sit, non est tamen in regno temporali, sed solum in spiritali.

16. Hæc vis argumenti tui est. Sed, an non vides retorqueri posse in tuum Regem? Imo, eodem planè argumento, &

regno temporali , & Primatu Ecclesiæ spoliari potest Rex tuus. Quod sic ostendo. Si Rex tuus habet Regnum temporale , vel habet illud tanquam Vicarius D E I immortalis , (quod ipse vult) vel tanquam Vicarius C H R I S T I mortalis . Neutrum dici potest. Non prius ; quia D E V S , quâ immortalis , non habet Vicarium mortalem , vt tu sponte affirmas : At Rex tuus , sine dubio , mortalis est : Ergo non est Vicarius D E I immortalis. Nec posterius , quia C H R I T V S , quâ mortalis , non habet regnum temporale : Ergo nec Vicarium regni temporalis : Ergo Rex tuus non est Vicarius C H R I S T I in regno temporali. Aut ergo omni regno temporali exutus est ; aut , si quod habet in eo gubernando debet esse alterius Vicarius , quàm D E I immortalis & C H R I S T I mortalis. Hoc non concesseris : Ergo illud concedendum est.

17. Hinc viterius concludo ; Rex tuus non alio titulo arrogat sibi Primatum Ecclesiæ , nisi quia Rex est temporalis & Vicarius D E I : At iam ostendi ex tua doctrina , non esse Regem
tem-

temporalem, nec Vicarium Dei: Ergo non potest titulo Regis temporalis, arrogare sibi Primatum Ecclesiæ. Hic tu succurre illi, si potes.

V. ARGVMENTVM.

18. **Q**Vintum argumentum sumi potest, ex illis verbis tuis, pag. 39. *Aliud est priuare Regem bonis Ecclesiæ communibus, quod facit sententia, & Potest forte Pontifex: aliud priuare bono proprio id est, regno suo, quod non facit sententia nec potest Pontifex. Priuabit censura Pontificis societate fidelium, quâ fideles sunt: bonum enim illud spirituale, & ab Ecclesiâ: Non priuabit obedientiâ subditorum, quâ subditi sunt: bonum enim ciuile hoc, nec ab Ecclesiâ.*

19. Hic distinguis duplicia bona, quæ Regi conueniunt. Alia vocas Spiritualia, quæ ab Ecclesiâ sunt; alia ciuilia, quæ ab Ecclesiâ non sunt. Addis, hæc esse propria Regis quibus, per Censuram priuari non potest:

illa, communia Ecclesiæ, quibus priuari potest. Nunc quæro, an primatus Ecclesiæ, quem Rex usurpat, pertineat ad communia bona Ecclesiæ; an potius ad propria ciuilia? Alterutrū fateri oportet, si distinctio tua proba & sufficiens est. Si pertinet ad bona communia Ecclesiæ, sequitur, quemuis fidelem, qui in Ecclesia est, non minus esse Primatem Ecclesiæ, quam Regem. Nam bona, quæ omnibus Christianis in Ecclesia existentibus communia sunt, non magis ab vno, quàm ab alio usurpari debent. Si autem pertinet ad bona ciuilia, sequitur, Regem, per censuram Ecclesiasticam non priuari Primatu Ecclesiæ; ac proinde, postquam excommunicatus est, & extra Ecclesiam, more Ethnicorum, constitutus, adhuc manere Primatem Ecclesiæ. Quo nihil absurdius.

20. Simile argumentum sumitur ex verbis tuis sequentibus, quæ sic habent, pag.

40. *Rex quiuis, cum de Ethnico Christianus fit, non perdit terrenum Ius, sed acquirit Ius nouum, puta, in bonis Ecclesiæ spiritualibus. Itidem: cum de Christiano fit sicut Ethnicus, vigore sententiæ amittit nouum Ius, quod acquisierat in bonis Ecclesiæ spiritualibus: sed retinet tamen*

tamen terrenum Ius, antiquum Ius in temporalibus, quod fuerat illi proprium, priusquam Christianus fieret.

21. Hic etiam distinguis duplex Ius Regis. Alterum antiquum & terrenum, quod Rex habet antequam est Christianus. Alterum nouum & spiritale, quod acquirit, quando fit Christianus. Nunc similiter quæro, an Primatus Ecclesiæ, quem Rex tuus vsurpat, pertineat ad Ius antiquum & terrenum, an potius ad nouum & Spiritale? Si ad antiquum & terrenum, sequitur, Reges Ethnicos, antequam Christiani fiunt, habere Primatum Ecclesiæ, quod est absurdum. Si ad nouum & Spiritale, sequitur, Reges, quando per baptismum fiunt Christiani, seu membra Ecclesiæ, plus accipere in baptismo, quàm alios homines, quod tu alibi negas. Contendis enim, omnes mortales, cuiuscunque sortis aut dignitatis sint, pares esse in ijs, quæ per baptismum acquiruntur.

VI. ARGUMENTVM

22. **S**extum argumentum insinuas, pag. 35. *cùm ais; Nec enim Regum subditi, quâ subditi, Ecclesie pars vlla sunt, sed regni. Antequam de Ecclesia essent, subditi erant: cùm extra Ecclesiam sunt, nihilominus manent subditi. Quâ fideles sunt, pars Ecclesie sunt: quâ subditi sunt, Regni ac Reipublice pars sunt.*

23. Vnde sic argumentor; Iurisdictio Regis, non extendit se, nisi ad subditos Regis, quâ subditi sunt, (si enim spectentur, quâ subditi non sunt, non possunt subesse iurisdictioni Regis) At subditi Regis, quâ subditi, non sunt pars Ecclesie, sed tantum Reipublice, vt tu asseris: Ergo Iurisdictio Regis, quam habet in subditos, quâ subditi sunt, non potest esse Ecclesiastica, sed tantum ciuilis: Ergo non subsunt Regi in rebus Ecclesiasticis, sed tantum in ciuilibus. Nihil certius ex tuo principio.

ARGV-

ARGVMENTVM SA-
cellani Pro Primatu
Regis.

24 **O** Stendi hæctenus, extua doctrina
sumi posse firma argumenta ad e-
uertendum Primatum Regis. Nunc vi-
deamus, an æquè valida sint, quibus eun-
dem Primatum astruere conatus es. O-
mittam ea, quæ tibi cum Rege commu-
nia sunt, & alibi à me refutata. Vnum,
quod tibi peculiare est, excutiam. Hoc
autem proponis, pag. 157. his verbis;
*Dixit olim Iosue populus, in omnibus paritu-
rum se ei, sicut & Mosi paruerunt: parue-
runt autem & Mosi in Ecclesiasticis. Non
intercessit tum Pontifex Eleazarus, ne in o-
mnibus, sed temporalibus. Quod si quicquam
interesse putet, quod Iosue verus DEI cultor
fuit: ne in Orthodoxis solis locum habere vi-
deatur; Rex Babel certè, hæretico par, nem-
pe idololatra; cui tamen Propheta non mo-
do non dissuasit populo, sed auctor etiam fuit*
sub-

submittendi colla sub iugo eius, eiq³ serviendi. Idem Pharaoni factum, cuius absq^{ue} veniâ, nec pedem mouere voluerunt de Aegypto, ut DEO sacrificarent. Idem Cyro, cuius iidem absque venia, nec excedere Chaldaea, ut templum ædificarent.

25. Vis argumenti est hæc; non soli Orthodoxi Reges in veteri Testamento, sed etiam gentiles & idololatræ, habuerunt Primatum Ecclesiæ Ergo idem dicendum est de regibus Noui Testamenti. Priorem partem antecedentis probas exemplo Iosue, cui populus Iudæorum dixit (Iosue 1. 17.) *Sicut obediuius in cunctis Mosi, ita obediemus & tibi.* At Mosi obediuerunt, non solum in temporalibus, sed etiam in Ecclesiasticis: Ergo & Iosue. Posteriorem probas exemplo trium Regum gentilium, Nabuchodonosoris in Babylonia, Pharaonis in Aegypto, & Cyri in Chaldaea, quibus etiam in Ecclesiasticis subiecti erant Iudei, quia sine illorum venia non audebant, aut sacrificium offerre, aut templum ædificare.

26. Ut videas, quàm parum momenti sit in hoc tuo argumento, singulas eius partes breuiter examinabo. Ac primo, dicam

cam aliquid de Mose. 2. de Iosue, quibus
 successit. 3. de Regibus gentilibus, quos
 citasti. De Mose certum est, fuisse
 modo Principem sæcularem, sed etiam
 ecclesiasticum: aut, si omnia dicenda sunt,
 quadruplicem personam sustinuisse. Pri-
 mam, Principis sæcularis. Alteram, Le-
 gislatoris. Tertiam, summi sacerdotis seu
 Pontificis. Quartam, Prophetæ. Hoc te-
 statur Philo lib. 3. de Vita Mosis, in fine,
 cum ait; *Hæc est vita, hic exitus Mosis Regis,
 Legislatoris, Pontificis, Prophetæ.* Et apertè
 conuincitur ex scripturis. Quod enim
 fuerit Princeps seu Iudex sæcularis, pater
 ex illo Exodi 18. 13. *Altera die sedit Moses, ut
 iudicaret populum, qui assistebat Mosi à mane
 usque ad vesperam.* Vnde Augustinus quæst.
 68. in Exodum; *Sedebat, inquit, iudiciaria
 potestate solus, populo uniuerso stante.* Quod
 fuerit Legislator, patet manifestè, tum ex
 aliis locis, tum ex illo, Ioann. 1. 17. *Lex per
 Mosén data est.* Quod fuerit Pontifex, seu
 summus sacerdos, partim colligitur ex il-
 lo, psal. 98. 6. *Moses & Aaron in sacerdotibus
 eius;* partim ex officio Sacerdotali, quod
 exercuit. Nam (ut habetur Leuit. 8.) con-
 secrauit Aaronem in sacerdotem, sancti-
 fica-

ficauit tabernaculum & altare , ob-
tulit sacrificia , & holocausta , ob-
tulit incensum Domino. Hoc au-
tem nemini licebat facere nisi Sacerdo-
ti, iuxta illud 2. Paralip. 26. 18. *Non est
tui officij Ozia , vt adoleas incensum Domi-
no , sed Sacerdotum.* Quod denique fue-
rit Propheta, constat ex illò. Num. 12.
6. *Si quis fuerit inter vos propheta Domini,
in visione apparebo ei , vel per somnium lo-
quar ad illum. At non talis seruus meus
Moses , qui in omni domo mea fidelissimus
est. Ore enim ad os loquor ei , & palam , &
non per anigmata , & figuras Dominum videt.*
27: Iosue non successit Mosi in his
omnibus. Non enim in Pontificatu, seu
summo sacerdotio. Non in Legislatio-
ne. De Prophetia non disputo. Suc-
cessit tamen in Principatu sæculari. Hoc
patet ex illo. Num. 27. 18. *Dixitque Do-
minus ad Moysen : Tolle Iosue filium Nun,
& pone manum tuam super eum. Qui sta-
bit coram Eleazaro sacerdote & omni mul-
titudine : & dabis ei præcepta cunctis viden-
tibus , & partem glorie tue , vt audiat eum
omnis Synagoga filiorum Israel. Pro hoc ,
si quid agendum erit , Eleazar Sacerdos con-
sulet*

sulet Dominum. Ad verbum eius egredietur & ingredietur ipse, & omnes filij Israel cum eo, & cætera multitudo. In quibus verbis tria notanda sunt, quæ ad rem nostram faciunt. Primum, quod Iosue sit designatus successor Mosi. Alterum, quod Moses dederit illi *partem gloriæ suæ*, id est, quod non dederit illi totam potestatem quam habebat, tam sæcularem, quàm Ecclesiasticam, sed tantum sæcularem. Tertium, quod voluerit illum subesse Eleazaro Sacerdoti, & ad eius imperia omnia facere. Hoc enim significant illa verba; *Pro hoc (Iosue) si quid agendum erit, Eleazar Sacerdos consullet Dominum. Ad verbum eius id est. Eleazari, egredietur & ingredietur Iosue.*

28. Hinc facilè intelliges, quàm alieno sensu à te citatum sit illud; *Sicut in istis obediimus Mosi, ita obediemus & tibi.* Tu enim sic accipis, quasi populus Iudæorum debuerit in omnibus, tam Ecclesiasticis quàm sæcularibus obedire Iosue, sicut obediuerat Mosi. Sed erras. Primo, quia in Ecclesiasticis debebāt obedire Eleazaro sacerdoti. Secundo quia illa verba, *Sicut obedi-*

obediuiimus Moſi, non ſunt prolata à toto populo, ſed tantum à Rubenitis, Gaditis, & dimidia tribu Manaſſe. Nec illi völuerunt dicere, quod vellent obedire Ieſuæ in omnibus ſimpliciter, in quibus Moſi obediuerant (tameſi ſæpè huic obinurmurarent, & non obedierint) ſed in iis tantum, quæ à Moſe circa illos conſtituta erant; nimirum, vt relictis vxoribus, filiis, ac iumentis in eo loco, in quo tunc erant, ipſi armati cum reliquis tribubus tranſirent Iordanem, & pugnarent contra hoſtes, donec iis debellatis, reliquæ tribus haberent quietam ibi poſſeſſionem. Hoc patet ex contextu, qui ſic habet; Rubenitis quoque & Gaditis, & dimidiæ tribui Manaſſe ait: Mementote ſermonis, quem præcepit vobis Moſes ſamulus domini dicens: Dominus DEVS veſter dedit vobis requiem, & omnem Terram. Vxores veſtræ & filij ac iumenta manebunt in terra, quam tradidit vobis Moſes trans Iordanem. Vos autem tranſite armati ante fratres veſtros, omnes for es manu, & pugna- te pro eis, donec det dominus requiem fratribus veſtris, ſicut & vobis dedit, & poſſideant ipſi quoque Terram, quam dominus DEVS veſter daturus eſt eis: & ſic reuertemini in terram poſſeſſionis

sessionis vestra, & habitabitis in ea, quam vobis dedit Moses famulus Domini trans Iordanem contra Solis ortum. Vnde, quod immediate sequitur (Omnia, quæ præcepisti nobis, faciemus, & quocunque miseris, ibimus: sicut obediuimus in cunctis Moysi, ita obediemus & tibi.) refertur ad illa, quæ præcesserunt. At in iis, quæ præcesserunt, nulla fit mentio rerum Ecclesiasticarum, sed tantum belli suscipiendi contra hostes, qui terram inhabitabant.

29. Igitur ex hac parte, vt vides, corruit tuum argumentum, & ex falso principio procedit. Ex altera parte, quâ agitur de Regibus gentilibus & idololatriis, non video, quam vim habeat. Nam tres illi Reges, quos citasti, vel ex tua sententia, fuerunt Primates Ecclesiæ DEI, vel non fuerunt. Non dices fuisse, quia non semel contrarium asseris in *Tortura* tua. Et merito; quia qui extra Ecclesiam DEI sunt, non possunt esse in eâ Principes & gubernatores. Si ergo non fuerunt Primates Ecclesiæ; sicut reuera non fuerunt; quomodo illorum exemplo probare vis, Regem Angliæ esse primate[m] Ecclesiæ? Hoc solum video te posse efficere, quod

E sicut

sicut Iudæi non audebant egredi ex Ægypto, ut Deo sacrificarent, sine venia Pharaonis, qui illos suo iugo crudeliter subiecerat; sic etiam Catholici, qui in Anglia sunt, non audent egredi ad loca Catholica, ut ibi Eucharistiam Catholico ritu suscipiant, nisi impetrata venia à Iacobo Rege, qui id sine sua voluntate non vult fieri, sub pœna carceris aut capitis. Et sic deinceps. Sed quid hoc ad Primatum Ecclesiæ? Potius ad tyrannidem, vel impietatem spectare dixerim.

E P I L O G U S.

HAbes breuiter, quid mihi visum sit de tuo libro, quem pro Rege scripsisti. Habes, inquam, hæc tria puncta. Primo, quod sæpè, non tam argumentis, quàm conuitiis rem gesseris. Secundo, quod omnia Paradoxis ac falsis opinionibus fœdaueris. Tertio, quod Primatû Regis, quem astruere voluisti, euerteris potius, quam firmaueris. Et hæc omnia ex studio adulandi Regi, orta sunt. Igitur, si hoc studium represseris, & solam rei veritatem spectaueris; facillimum erit, priora vitia emendare. Quod ut facias, omnino tibi

tibi author sim. Facies autem, si DEVM, qui prima veritas est, præ oculis habebis.

A P P E N D I X.

De comparatione Regis & Pontificis.

TV quidem in tuo libro, sic componis Regem & Pontificem inter se, vt apertè huius authoritatem deprimas; illius, supra quàm par est, extollas. Igitur, quid ante te senserint alii, paucis tibi ob oculos proponam; vt integrum tibi sit, vel mutata sententiâ, in eorum arbitrio acquiescere; vel retenta, in errore peruicaciter persistere. Sic ergo alij ante te.

Num. 27. 21. *Pro Iosue, si quid agendum erit, Eleazar Sacerdos consulet Dominum. Ad verbum illius (Eleazari) egredietur & ingredietur ipse, & omnes filij Israel cum eo, & cetera multitudo.* Igitur Princeps sæcularis iubetur ad arbitrium Sacerdotis sua facere.

Deuter. 17. 12. *Qui superbierit, nolens obedire Sacerdotis imperio, qui eo tempore ministrat Domino Deo tuo, morietur homo ille, & auferes malum de Israël.*

1. Reg. 22. 17. *Ait Rex Saul emissariis, qui*

E 2 *circum.*

non reputabitur tibi in gloriam. Iratusq; Ozias, minabatur Sacerdotibus. Statimque orta est lepra in fronte eius coram Sacerdotibus: Et festinato expulerunt eum.

Ioan. 21. 32. *Pasce oues meas.* Matth. 16. 19. *Tibi dabo clauēs regni cælorum.* Act. 20. 28. *Spiritus sanctus posuit Episcopos, non Reges sæculares, regere Ecclesiam Dei.* 1. Corinth. 4. 1. *Sic nos existimet homo, ut ministros Christi, & dispensatores mysteriorum Dei.* 2. Corint. 5. 20. *Pro Christo legatione fungimur.*

Gregorius Nazianzenus ad Imperatores Constantinopolitanos, apud Gratianum dist. 10. can. 7. *Libenter accipitis, quod lex Christi Sacerdotali vos subiicit potestati. Dedit enim & nobis potestatem: dedit & principatum multo perfectiorem principatibus vestris.*

Gregorius Papa ad Hermannum, Episcopum Metensem, dist. 96. can. 9. *Quis dubitet Sacerdotes Christi, Regum & Principum Patres & Magistros censerī?*

Ioan. Papa, dist. 96. can. 11. *Si Imperator Catholicus est: filius est, non Præsul Ecclesiæ. Quod ad religionem competit, discere ei competit, non docere.* Et infra; *Imperatores & Reges Christiani subdere debent executiones suas Ecclesiasticis Præsulibus, non præferre.*